

DIDZA' BUROPI GUSÓL-LĒ'Ē PABLO YÖDZÖ CORINTO

Pablo rugapë' Dios bönachi queë' Cristo nacu'ë Corinto

1 ¹ Neda', Pablo, naca' gubáz queë' Jesucristo tu' ré'ënë' caní Dios. Bi'i bóchí'ru' Timoteo runbi' neda' tsözxón. Rugapa' Dios libí'ili', rudúbili' queë' Dios lu yödzö Corinto, enca' yúgu'tëli' néquili' quez queë' Dios luyú Acaya ga na' nababa Corinto. ² Rinábida'-në' Xúziru' Dios, en Xanru' Jesucristo uzá' ládxë'ë queéli', en gunë' ga soa dxi icja ládxi'do'oli'.

Yugu' le gudí'i guzxáquë'ë Pablo

³ iYöl-la' ba Dios, Xuzë' Xanru' Jesucristo, tu' náquië' Xúziru', en ruhuéchi' ládxë'ë rë'u, en náquië' ca' Dios, Nu ruhué tsáhuí'tica'sö rë'u! ⁴ Dios ruhué tsáhuë'ë rë'u cate' raca bíti'tës bi raca queëru', para gaca hué tsáhuí'ru' ca' nupa bi raca quéguequi. Ruhué tsáhuí'ru' légaquië' ca na' Dios ruhué tsáhuë'ë rë'u.

⁵ Tsca ta'yán le riguí'i rizáca'ru', ca na' gudí'i guzxáquë'ë Cristo, lësca' caní ta'yán le tu'hué tsahui' rë'u, tu' nácaru' tuz len Cristo. ⁶ Que lë ni na', channö bi riguí'i rizáca'tu', raca caní queëtu' para gaca hué tsáhuí'tu' libí'ili', en guntu' ga uláli'. Channö Dios ruhué tsáhuë'ë netu', raca caní para gaca hué tsáhuí'tu' libí'ili', ate' lu yöl-la' riböza zxön ladxi' queéli', gaca guá' ilenli' yugu' le quí'i sáca'li', ca na' raca ca' queëtu'. ⁷ Ruzxöni ládxi'tu'-në' Dios gúntica'së' ga gaca dxi'a queéli', tu' chinóztu' ca na' riguí'i rizáca'li' tsözxón len netu', lësca' caní ruzí'ili' xibé tsözxón len netu' le ruhué tsáhuë'ë Dios rë'u.

⁸ Ré'ënitú' inózili', böchi' luzá'ado', ca naca le zían le gulaca queëtu' luyú Asia. Gudóditë bë' lë na' guca queëtu', ate' guca zí'tërö ca le guca guá' ilentu'. Ca' guca, bíti'rö bentu' löza sóatu' ibantu'. ⁹ Gúquitu' guca queëtu' ca raca quégaquië' bönni' chinarugu quégaquië' ilátië'. Guca caní queëtu' para cabí uzxöni ládxi'tu' la' cuínsitu', pero uzxöni ládxi'tu'-në' Dios, Nu rusubán nupa chinátigaca. ¹⁰ Dios busölé' netu' lu lë na' ben ga guzóa bönadxi gátitu', ate' rusölé' netu' yúgu'të dza. Runtu' löza usölé' Lë' netu' caní leyúbölö ¹¹ channö gácalenli' netu', ulídzali'-në' Dios, en inábili'-në' gácalenë' netu'. Dios gunë' ca na' inábili'-në' tsözxón len bönachi zían, uzá' ládxë'ë queëtu', ate' ila'nná: "Xclenë' Dios" ni'a queëtu'.

Rigúixjö'ë Pablo bizx que ridzenë' idxinë' Corinto

¹² Lë ni le run ga rudzéjatu'. Bö' naca caztu' ruluí'i netu', len yöl-la' ba'a ladxi' queëtu', en idú ládxi'tu' runtu' bi runtu' yödzölió ni, ate' caní bentu' ca' ga ni' zóali'. Caní bentu', tu' gúcalen netu' le buzá' ládxë'ë

Dios queétu', en calëga len yöl-la' réajni'i queéztu' bentu' caní.

¹³ Ruzúajsötu' queéli' lu guichi le gaca ulábali', en le gaca tséajni'ili'. Raca ládxa'a tséajni'ili' idú ¹⁴ lë na' réajni'ili' lati'. Ní'irö cate' idxín dza huödë' Xanru' Jesucristo, gaca gunli' netu' zxön ca na' netu' guntu' libí'ili' zxön.

^{15,16} Tu' bena' löza lë ni, guzá' ládxa'a guída' ga zóali' zí'alö cate' gudöda' luyú Macedonia, ate' guída' ga zóali' leyúbölö cate' uzá'a ni para uzí'ili' xibá' chopa luzuí. Tödi ni' huáca gácalenli' neda' ugú'uli' neda' nöza tseja' luyú Judea. Caní gú'unida' guna'. ¹⁷ ¿Naru' réquitseli' guzxí' yë'a tu' butsó'a ca guna'? ¿Naru' réquitseli' lu yöl-la' bönáchisö quia' runa' le rizá'asö icja', en b'é'sa' ca' didza' cate' gunnía': "Caní guna'?" ¹⁸ Ni'a queë' Xanru' Dios, Nu run idútë ca rnna xtídzë'ë, biti' b'é'sa' ca' didza' cate' b'é'lëna' libí'ili' xtídzë'ë Dios. ¹⁹ Jesucristo, Zxí'inë' Dios, Nu na' bentu' libán que ga zóali', neda' len Silvano, en Timoteo, biti' ruí'isë' ca' didza'. Lë' ru'ë didza' idútë li. ²⁰ Cristo caz runë' ga naca idútë löza yúgu'të le guzxí' lu në'ë Dios, ate' ni'a queë' Lë' gaca innaru': "Ca' gaca", para gaca queë' Dios yöl-la' ba. ²¹ Dios caz runë' ga runtu' löza tsözxön len libí'ili' néquiru' queë' Cristo, en budödë' lu na'tu' dxin queë' runtu'. ²² Bennë' queëru' le naca bë' néquiru' queë', tu' guchízië' icja ládxi'do'oru' Dios Bö' Lá'ayi, Nu naca queëru' le run ga naca löza yúgu'të le gunnë' Dios queëru'.

²³ Ni'a queë' Xanru' Dios, Nu nözi le rizá' ládxa'a, ruá'a didza' idútë li. Nózinë' Lë' biti' bida' ga zóali' lu yödzo Corinto, para cabí gun bayudxi guna' ga huí'inili'. ²⁴ Biti' ré'ënitü' inná bé'etu' libí'ili' ca réajlë'ëli' Cristo, tu' chinácali' tsutsu ca réajlë'ëli' Lë'. Ré'ënitü' guntu' le gun ga udzeja ládxi'li'.

2 ¹ Que lë ni na' bë' ládxa'a cabí guídatea' queéli' zí'alö, para cabí guna' ga huí'inili'. ² Channö guna' neda' ga huí'inili', ¿nuzxi caz gun ga udzëjada' neda'? ¿Naru' guntsa' ga huí'ini nu ral-la' gun ga udzëjada' neda'? ³ Que lë ni na' buzúaja' queéli' lu guichi zí'alö. Biti' gú'unida' guída' ga zóali', para cabí gunli' libí'ili' ga huí'inida' neda', tu' ral-la' gácali' libí'i cázali' le gun ga udzëjada' neda'. Tu' ruzxöni ládxa'a libí'ili', nözda' udzëjali' yúgu'tëli' channö udzëjada' neda'. ⁴ Cate' ni' buzúaja' queéli' lu guichi lë na', gusébide'e ládxa'a, en buí'inide'e ládxa'a ga bidxintë gurödxä'. Buzúaja' caní lu guichi, calëga para guna' ga huí'inili', pero para inózili' ca nadxí'ide'eda' libí'ili'.

Ral-la' uniti loru' nu ruá' dö' cate' rubí'i ladxi'

⁵ Channö zoë' tu bönni' ni', bönni' na' busuhuí'ininë' rë'u, calëga néda'sö busuhuí'ininë', pero huáca innaru' busuhuí'ininë' yúgu'tëli' libí'ili'. Rnnía': "Huaca innaru'", para cabí tödi bë' ichugu bë'a queë' bönni' na'. ⁶ Tscati' gaz xíguia' chibenli' látu'biqui' yúgu'tëli' queë' bönni' na'. ⁷ Na'a, ral-la' uniti loli' bönni' na', en utípali' ládxe'ë, para

cabí tödi bē' huí'ininē', en para cabí gaca tsaz chopa ládxē'ē. ⁸ Que lē ni na' ráta'yua' loli' gunli' le gaca bē' nadxí'ili'-nē' idú ládxí'li'. ⁹ Que lē ni na' ca' buzúaja' queé'li' lu guichi lē na'. Gú'unida' si' bē'a libí'ili' para inözda' channö rúntica'sili' ca rnna xtídza'a. ¹⁰ Cate' nu runiti loli' libí'ili', neda' ca' runiti lahua' nu na'. Cate' nu runiti lahua', channö bi ben nu na' runiti lahua', runa' caní uláz queē' Cristo para gaca bi uzí'ili' xibé. ¹¹ Caní runa', para cabí sequi' Satanás tu' xihui' ucúl-la rē'u, tu' chinöziru' yugu' le ré'ēni gun queēru'.

Gurö'ē böniga Pablo lu yödzo Troas

¹² Cate' bidxina' lu yödzo Troas para guna' libán que didza' dxi'a queē' Cristo, bēnnadē'ē Xanru' neda' lataj guna' libán ni'. ¹³ Sal-la' guca caní, gurö'a böniga tu' cabí yöjxáca'a-bi' bi'i bóchi'ru' Tito ni'. Que lē ni na' buzá'alena' bönachi ni', ate' guyija' luyú Macedonia.

Idéli'ru' tu' zóalenē' Cristo rē'u

¹⁴ ¡Xclenē' Dios! Richē'tica'sē' rē'u ca tu le naca bē' bidéli'nē' Cristo yöl-la' rusölá queēru'. Dios rugunē' dxin rē'u para rulu'ē lahui ca gaca ilúnbē'e bönachi Cristo. Le nácaru' naca ca tu le rilá' zxixi, le riguisi gáti'tēs. ¹⁵ Nácaru' ca tu nōri rilá' zxixi, le ruzégui'ē Cristo lahuē' Dios, en le riguísiē' lógaca nupa nulágaca, en nupa nanítigaca. ¹⁶ Lógaca nupa na' nanítigaca nácaru' ca tu le rilá' siguti le naca bē' ilátiē'. Lógaca nupa na' nulágaca nácaru' ca tu le rilá' zxixi le naca bē' ibántica'siru'. ¿Nuzxi caz naca lesaca' gaca que caní? ¹⁷ Biti' runtu' ca tun zían bönachi, nupa tu'gún dxin xtídzē'ē Dios ca tu le tuti', en to'o. Tu' nasól-lē'ē Dios netu', idú ládxí'tu' ruí'itu' didza' lahuē' Lē' tu' nácatu' tuz len Cristo.

Ca naca didza' le ruún rē'u tuz len Dios

3 ¹ ¿Naru' réquitseli' run ba zxön cuintu' cate' ruí'itu' caní didza'? ¿Naru' runtsö bayudxi ulu'itu' libí'ili' tu guichi le rulu'í' le nácatu'? ¿Naru' ral-la' inábitu' libí'ili' gúnnali' queé'tu' tu guichi caní, ca na' tun bal-la bönachi? ² Libí'i cázali' nácali' ca tu guichi le rulu'í' le nácatu', le nazúaj lu icja ládxí'do'otu', ate' yúgu'tē bönachi gaca ulu'laba le, en tséajni'iguequi le. ³ Le nácali' nalá' lahui ca tu guichi nuzúajē' Cristo, le gusól-lē'ē lu na'tu'. Biti' nazúaj tu lu guichi, pero Bö' Lá'ayi queē' Dios ban nuzúajē' le, calēga tu lu guió'jta'a, pero lu icja ládxí'do'oli' nuzúajē'.

⁴ Ruí'itu' caní didza' tu' ruzxöni ládxí'tu'-nē' Dios tu' zóalenē' Cristo rē'u. ⁵ Biti' réquitu' bi gaca guntu' rácasö queé'tu', pero Dios runnē' queé'tu' yöl-la' huáca bi guntu'. ⁶ Dios caz bennē' queé'tu' yöl-la' huáca guntu' xichinē' lu didza' cubi na', le ruún rē'u tuz len Dios. Didza' ni biti' naca tu xibá nazúaj lu guichi, pero naca tu le nusédinē' Dios Bö'

Lá'ayi rë'u. Xibá na' nazúaj lu guíchisö richugu queéru' gátiru', pero Dios Bö' Lá'ayi nabániru'.

⁷ Yugu' xibá queë' nazúajgaca lu guichi, Dios buzúajë' yugu' lu guiójt'a, ate' bulu'e lahui yöl-la' bení' queë' cate' budödë' le lu në'ë Moisés. Sal-la' gudödi que, guyépitërö yösa bení' lahuë' Moisés. Caní guca, bití' guca ulu'yú bönachi Israel lahuë' Moisés. Channö yöl-la' bení' caní yöjtsaga xibá na', ate' xibá na' richugu quégaca bönachi ilátigaca, ⁸ zxóntërö naca yöl-la' bení' na' dzaga yugu' le runë' Dios Bö' Lá'ayi. ⁹ Yöjtsaga yöl-la' bení' lë na' ben ga narugu quégaca bönachi ilátigaca. Zxóntërö naca yöl-la' bení' que lë na' run ga rnnë' Dios nácagaca tsahui' bönachi. ¹⁰ Tu' nácatërö lesaca' yöl-la' bení' na' nalá' lahui na'a, cuídí'sö nagá'ana yöl-la' bení' na' bilá' lahui cate' Dios bunödzjë' xibá queë' quégaca bönachi. ¹¹ Channö guzóa yöl-la' bení' que lë na' guzóa tu chí'ido'osö, zxóntërö naca yöl-la' bení' que lë ni sóatica'sö.

¹² Tu' zoa lë ni runru' löza, ruí'itu' didza' lu yöl-la' rugu ladxi'. ¹³ Bití' runtu' ca benë' Moisés, bucache' lahuë' len tu lári'do', para cabí ulu'yú bönachi Israel yöl-la' bení' na' zeaj riniti. ¹⁴ Gula'chul-la gula'nítië' yugu' bönni' ni'. Ga ridxintë na'a dza cate' tu'labë' guichi que didza' gula na' le ruún bönachi tuz len Dios, naca tsca nagá'ana la' leze lári'do' na' lógaquië', lë na' gaca ugüë' tuzë' Cristo. ¹⁵ Ga ridxintë na'a dza, cate' tu'labë' guichi ga na' nazúaj didza' queë' Moisés, zxa ca tu lári'do' guiójt lógaquië' le run ga nachul-la nanítigaquië'. ¹⁶ Cate' nu ruhuóaca queë' Xanru', rigúa lë na' run ga nachul-la naniti nu na'. ¹⁷ Cate' ni rnnatu': "Xanru'", ruí'itu' didza' queë' Dios Bö' Lá'ayi. Ga zoë' Bö' Lá'ayi queë' Xanru', ni' zoa caz yöl-la' nadzán. ¹⁸ Yúgu'tëru' rë'u bití' bi nusayaj loru'. Nácaru' ca tu guíë dxili ga nalá' yöl-la' bení' que lahuë' Xanru', ate' yöl-la' bení' na' queë' Xanru', Nu naca Bö' Lá'ayi, rutsá' rë'u, en run ga zeaj rácaröru' ca náquië' Cristo caz, en ráta'rö queéru' yöl-la' bení' queë'.

4 ¹ Dios buéchi' ládxë'ë netu', en budödë' lu na'tu' dxin ni runtu'. Que lë ni na' bití' raca chopa ládxí'tu'. ² Chibucá'anatu' le tun bönachi bagáchí'sö, en le tun ga rutuí'iru'. Cuntu nu rizí' yé'etu', en bití' rutsá'atu' xtídzë'ë Dios. Tu' ruí'itu' didza' que le naca idútë li, ruí'i ládxí'tu' guntu' le iléquibe'e yúgu'të bönachi naca dxi'a lahuë' Dios. ³ Channö zoa nu bití' réajni'ini didza' dxi'a runtu' ba nalí que, nácagacasö nupa nachul-la nanítigaca bití' ta'yéajni'i le. ⁴ Bití' ta'yéajlë' bönachi na'. Ben tu' xihui' ga naca caní, nu na' nun cuini ca dios, en rinná be'e bönachi dza ni zóaru' na'a. Ben ga nachul-la nanítigaca, para cabí ila'lé'e bení' que didza' dxi'a ca naca yöl-la' bení' queë' Cristo, Nu na' naca idú ca náquië' Dios caz. ⁵ Bití' runtu' libán que la' cuínsitu', pero runtu' libán queë' Jesucristo, en riguixjö'ötu' náquië' Xanru', ate' netu' ni nácatu' huen dxin queé'li' tu' nadxí'itu'-në' Jesús. ⁶ Dios, Nu ben ga buzení' bení' ga ni' guca chul-la, náquië' Nu rigú'u bení' icja

ládxi'do'oru', le ruzéajni'i rë'u para gúnbë'ëru' yöl-la' bení' queë' Dios, lë na' ruzení' lahuë' Jesucristo.

Tu' réajlë'ëru' Dios runru' ca ré'ënë' Lë'

⁷ Yöl-la' tsahui' ni yu'u icja ládxi'do'oru' rë'u. Nácaru' ca yugu' yusu' yu, para gaca bë' nequi queë' Dios yöl-la' huáca zxön na', en calëga que cázaru'.

⁸ Tu'saca' zi' bönachi netu', pero biti' rudú ládxi'tu'.

Ró'ötu' böniga, pero biti' raca chopá ládxi'tu'.

⁹ Ta'bía ládxi' bönachi netu', pero biti' rubéaj ládxi'ë Dios netu'.

Ta'zé'ede'e netu' yu, pero biti' tu'suniti netu'.

¹⁰ Lu idú le naca caztu' rátitica'stu' tsözxón len Jesús, na' naca bë' lu le naca caztu' nabánitu' Lë'.

¹¹ Tsanni ni zóatu' nabantu', zóatica'sö bönadxi gátitu' tu' néquitu' queë' Jesús para gaca bë' nabánitu' Lë' lu le naca caztu' le riniti. ¹² Caní naca, zoa bönadxi queétu' gátitu', pero ni'a que lë ni rata' yöl-la' na'bán queéli'.

¹³ Nazúaj lu guichi lá'ayi le rnna: “Guyéajlë'a Dios, ate' que lë ni na' bë'a didza'.” Lësca' caní raca queétu', réajlë'ëtu' Dios, en que lë ni na' ruí'itu' didza'. ¹⁴ Nöztu' ca gunë' Dios, Nu busubán Xanru' Jesús, usubanë' ca' netu' tsözxón len Jesús, en usudxinë' netu' tsözxón len libí'ili' lahuë' Lë'. ¹⁵ Raca caní yúgu'të lë ni para gaca bi uzí'ili' xibé. Channö ila'deli' zíanrö ca' bönachi le ruzá' ládxi'ë Dios queëru', ila'nnë': “Xclenë' Dios”, ate' gaca yöl-la' ba queë' Dios.

¹⁶ Que lë ni na', biti' raca chopá ládxi'tu'. Sal-la' riniti idú le naca caztu', yúgu'të dza rucubë' Dios le nácatu' lu icja ládxi'do'otu'. ¹⁷ Le cuídi'sö riguí'i rizáca'ru' ni tu chí'ido'osö run ga gata' queëru' le uzí'da'aru' xibé le sóatica'sö, en le nácatëro lesaca' ca gaca gúnbë'ëru'.

¹⁸ Biti' ruí'i ládxi'ru' le rilé'ëru' luyú ni, pero le biti' gaca ilé'ëru' ruí'i ládxi'ru'. Lë na' rilé'ëru', tu chí'ido'osö zoa, pero le cabí gaca ilé'ëru' sóatica'sö.

5 ¹ Nóziru' cate' initi idútë le naca cázaru', le naca ca tu yu'u lári'do' yödzölió ni, Dios chinupé'ë tu le cubi queëru', le naca ca tu yu'u le zoa tsaz ni' yehua' yubá, lë na' nun cazë' Lë'. ² Que lë ni na' rinné ládxi'ru' tu' ré'ënu' tsú'uru' le cubi ni', lë na' naca ca tu lídxiru' ni' yehua' yubá. ³ Tsú'uru' le cubi ni' ca na' rácuru' tu lari', para cabí sóaru' ga biti' zoa idútë le naca cázaru'. ⁴ Tsanni ni zóaru' lu idútë le naca cázaru', le naca ca tu yu'u lári'do', rinné ládxi'ru' lu yöl-la' risëbi ládxi' queëru'. Biti' runru' caní tu' ré'ënu' ucá'anaru' idútë le naca cázaru', pero ré'ënu' tsú'uru' tsaz le cubi ni'. Caní gaca, ucá'anaru' idútë le naca cázaru' le riniti, ate' tsú'uru' lu yöl-la' na'bán idú. ⁵ Dios chinupé'ë yúgu'të lë ni queëru', ate' guchízië' rë'u Dios Bö' Lá'ayi, Nu naca queëru' le naca bë' naca löza sí'iru' lë na' nupé'ë queëru'.

⁶ Que læ ni na' nadipa lãdxi'ru'. Tsanni ni yú'uru' lu le naca cázaru', nõziru' zóaru' zi'tu' ga zoa lidxè' Xanru'. ⁷ Runru' ca runru' tu' réajlè'èru'-nè' Dios, en calèga tu' zoa bi rilé'èru'. ⁸ Tu' runru' löza læ ni, ré'èniru' ucá'anaru' le naca cázaru' ni para tsöjsóalenru'-nè' Xanru'. ⁹ Que læ ni na' ruí'i lãdxi'ru' gunru' le raza lãdxè'è Xanru', channö ugá'anaru' lu idútè le naca cázaru' ni, o channö tsöjsóalenru'-nè' Xanru' ni'. ¹⁰ Caní runru' tu' run bayudxi idxinru' yúgu'tèru' lahuè' Cristo ga ni rö'è ruchi'a rusöröè'. Ní'irö ubilè que queèru' tsca naca le benru' tsanni ni yú'uru' lu le naca cázaru', channö benru' le naca dxi'a o le cabí naca dxi'a.

Le ruún rë'u tuz len Dios

¹¹ Que læ ni na', tu' rádxitu'-nè' Dios, ruí'i lãdxi'tu' uzéajni'itu' bönachi. Nõzinè' Dios ca naca le yu'u icja lãdxi'do'otu', ate' ruzxöni lãdxa'a nõzili' dxi'a ca' libí'ili' læ na' yu'u icja lãdxi'do'otu'. ¹² Biti' rubéaj cuintu' dxi'a loli'. Ré'ènitu' gata' lataj queéli' gunli' netu' bal, para gaca ubí'ili' didza', bi guiéli' yugu' bönni' tun ba zxön cuíngaquiè' ca na' tu'luí'isö lahui cuíngaquiè', en calèga ca nácagaquiè' lu icja lãdxi'do'gaquiè'. ¹³ Channö nachixi ícjatu', naca para gaca yöl-la' ba queè' Dios, en channö cabí nachixi ícjatu', naca para gaca bi uzí'ili' xibé. ¹⁴ Run bayudxi bi guntu' tu' nadxí'inè' Cristo rë'u, tu' chinóziru' tuz Nu guti uláz quégaca yúgu'tè bönachi, en que læ ni na' naca quégaca yúgu'tè bönachi tsca nátilengaca Lè' tsözxön. ¹⁵ Lè' gútiè' uláz quégaca yúgu'tè bönachi para cabirö ilunè' bönni' nabángaquiè' le nequi quégacasè', pero le nequi que Nu na' guti uláz quégaquiè', en bubán lu yöl-la' guti. ¹⁶ Que læ ni na', bíti'rö gúnbè'ètu' bönachi tsca naca le nalá'gaca láhui'lö, en sal-la' canísö bénbè'ètu'-nè' Cristo, biti' núnbè'ètu'-nè' caní na'a. ¹⁷ Channö nuhuóaca núti'tès bönachi tuz len Cristo, chinaca bönachi cubi nu na'. Chigudödi que le gulaca zí'alö, ate' chinucúbigaca yúgu'tè.

¹⁸ Yúgu'tè læ ni nunè' Dios, Nu bun rë'u tuz len Lè' lu në'è Cristo, en budödè' lu na'tu' guntu' libán ca gaca ulu'huóaca yúgu'tè bönachi tuz len Lè'. ¹⁹ Libán runtu' rnna caní: “Dios guzóalenè' Cristo, en benè' ga gaca ulu'huóaca bönachi yödzölió ni tuz len Lè', en biti' röjnenè' dul-la' gula'baga'.” Budödè' lu na'tu' didza' dxi'a ni, ca gaca ulu'huóaca bönachi tuz len Dios. ²⁰ Na'a, nácatu' gubáz queè' Cristo, en raca na'a ca Dios caz ráta'yuè' loli' lu rú'atu' netu'. Que læ ni na' ráta'yutu' loli' uláz queè' Cristo, guli'huóaca tuz len Dios. ²¹ Cristo biti' bi dul-la' benè', pero Dios budödè' Lè' ca tu bönni' dul-la' uláz queèru', para gata' queèru' lataj gácaru' tsahui' ca náquiè' Dios caz tu' nácaru' tuz len Cristo.

6 ¹ Tu' runtu' dxin tsözxön len Dios, ráta'yutu' loli', rnnatu': Biti' udódili' cá'asö le ruzá' lãdxè'è Dios queéli'. ² Nazúaj lu guichi lá'ayi ca gunné' Dios le rnna:

Tu dza buzá' ládxa'a quiu', biyönda' li',
ate' dza bena' ga gaca uló', gúcalena' li'.

iBuli'yútsöca'! iNa'a naca dza ruzá' ládxe'ë queéru'! iNa'a naca dza gaca uláru'!

³ Biti' ré'ënitú' bi guntu' le gun ga nu ichixi inigui, para cabí soa nu ucá'ana cá'asö dxin ni runtu'. ⁴ Ni'a que bíti'tës bi runtu', ruí'i ládxi'tu' gaca bë' nácatu' huen dxin queë' Dios. Que læ ni na', len yöl-la' riböza zxön ladxi' ruá' rilentu' yugu' le riguí'i rizáca'tu', en yugu' le riyadzaj queétu', en yugu' le tun ga ró'ötu' böniga. ⁵ Caní bentu' sal-la' gula'zé'ede'e bönachi netu' yu, en gula'gu'ë netu' lidxi guíë, en gula'bía di'i netu'. Gudödi bë' bentu' dxin, en bití' guta' lataj queétu' gásitu' o bi gágutu'. ⁶ Bë' ládxi'tu' gaca bë' nácatu' huen dxin queë' Dios. Guca bë' læ ni:

Tu' nácatu' ba'a ladxi', en tu' nápatu' yöl-la' réajni'i,
en tu' riböztu' zxön ladxi', en tu' nácatu' dxi'i ladxi',
en tu' zóalenë' Dios Bö' Lá'ayi netu',
en tu' naca idú ca nadxí'itu' luzá'atu'.

⁷ Ruí'itu' didza' idútë li, ate' zóalen netu' yöl-la' huáca queë' Dios. Le naca tsahui' naca ca tu le rudí'initu' lu gudil-la, enca' le run chi'i netu' lu gudil-la na'.

⁸ Nacuá' nupa tun netu' bal, enca' nupa tu'zóa netu' tsölá'alö.
Nacuá' nupa tu'lidza ditaj netu', enca' nupa tu'lidza tsahui' netu'.
Sal-la' ta'nná bönachi rizí' yé'ëtu', ruí'itu' didza' idútë li.

⁹ Sal-la' nacuá' bönachi bití' núnbë'gaquië' netu',
nacuá' ca' nupa núnbë'gaca netu'.
Ridatu' ga zoa bönadxi gátitu', pero ni zóatu' nabantu'.
Tunë' netu' xíguia', pero bití' tutië' netu'.

¹⁰ Tu'suhuí'ini netu', pero rudzéjatica'stu'.
Nácatu' bönni' yechi', pero runtu' ga rata' yöl-la' tsahui' idú quégaca bönachi zían.

Sal-la' bití' bi dë queétu', nequi queétu' yúgu'të le dë.

¹¹ Idú ládxi'tu' ruí'ilentu' libí'ili' didza', böchi' luzá'ado', zóali' Corinto. Buluí'itu' libí'ili' ca ruí'i ládxi'da'tu' libí'ili'. ¹² Channö cabí nácaru' tuz bití' naca tu' cabí ruí'i ládxi'tu' libí'ili', pero libí'i cázali' bití' ruí'i ládxi'li' netu'. ¹³ Na'a, ruí'ilena' libí'ili' didza' ca runë' tu bönni' ruí'ilenë'-bi' zxí'inë' didza', rnnía': Buli'bí'i queétu' ca rúnlentu' libí'ili'. Guli'güi' ladxi' netu'.

Nácaru' ca tu yudo' ga yu'ë Dios ban

¹⁴ Bití' gácali' tuz len bönachi bití' ta'yéajlë'.
¿Nacxi gácatsö ilaca tuz le naca tsahui', en le cabí naca tsahui'?
¿Nacxi gácatsö ilaca tuz le naca chul-la, en le naca bení'?

¹⁵ ¿Nacxi gácatsö ilácagaquië' tuz Cristo, en Satanás, tu' xihui'?

¿Nacxi gácatsö ilácagaquië' tuz tu bönni' réajlë'ë Cristo, en tu bönni' biti' réajlë'ë?

¹⁶ ¿Nacxi gácatsö ilaca tuz yudo' queë' Dios, en budó' guió'j budó' yaga?

Libí'i cázali' nácali' ca tu yudo' ga yu'ë Dios ban. Ca naca lë ni, Dios caz gunné':

Sóalena' légaquië', en tálena' légaquië'.

Gaca' Dios quégaquië', ate' légaquië' iláquië' bönachi quia'.

¹⁷ Que lë ni na', gunné' ca' caní:

Guli'ruáj ladjagaquië', en buli'lá'alén légaquië'.

Rnnë' Xanru': "Biti' gútsa'li' le ruá' dö', ate' si' lu na'a libí'ili'.

¹⁸ Neda' gaca' xuz cázali', ate' libí'ili' gácali' zxí'ina', bönni', en nigula."

Caní rnnë' Xanru', Nu napa caz idútë yöl-la' huáca.

7 ¹ Böchi' luzá'ado', néquiguequi queëru' yugu' lë ni guzxí' lu në'ë Dios. Que lë ni na' ral-la' un cuinru' dxi'a, en ubéajru' yúgu'të le rucá'ana cá'asö idútë le naca cázaru', en bö' naca cázaru'. Lu yöl-la' radxi queëru' Dios ral-la' guéquiru' quez queë' Lë'.

Ca bulu'bí'i ládxi'gaca nupa ta'yéajlë' Cristo

² Guli'sí' lu ná'ali' netu'.

Cuntu nu biá'atu' dö' que, nu dzaga libí'ili'.

Cuntu nu bentu' ga ichixi inigui.

Cuntu nu guzxí' yé'etu'.

³ Ruá'a caní didza', calëga para usubága'a libí'ili' xíguia', pero naca ca na' chigunnía' zí'alö, rnnía': Zoa' sina' ibánlena' libí'ili' o gátilena' libí'ili' tu' ruí'i ládxa'a libí'ili'. ⁴ Ruzxónida' ládxa'a libí'ili', en rúnda'a libí'ili' zxön. Sal-la' zían le riguí'i rizáca'tu', nadípada' ládxa'a, en rudzëjade'e ládxa'a.

⁵ Cate' bidxintu' luyú Macedonia, ga ridxintë na'a dza, biti' rata' queëtu' lataj uzí' ládxi'tu', pero zían le taca queëtu'. Ta'díl-lalen bönachi netu', ate' lu icja ládxi'do'otu' yú'ugaca le tun ga rádxitu'. ⁶ Ní'irö Dios, Nu rutipa ladxí' nu chizóa gaca chopa ladxí', butipë' ládxi'tu' cate' budxinbi' bi'i Tito ga guzóatu'. ⁷ Biti' gúcasö tu' budxinbi' queëtu', pero tu' gudíxjöi'ibi' ca' netu' ca na' libí'ili' butípali' ládxi'bi'. Gudíxjöi'ibi' netu' ca na' ré'ënide'eli' ulé'eli' neda', en ca na' ruhuí'inili' ni'a que lë na' guca ni', enca' ca ruí'i ládxi'li' neda'. Yúgu'të lë ni ben ga rudzeja ládxa'a.

⁸ Sal-la' le buzúaja' queéli' lu guichi zí'alö ben ga buí'inili', biti' ruhuí'inda' na'a. Zí'alö buí'inida' cate' gúquibe'eda' ben ga buí'inili' libí'ili' tu' chí'ido', ⁹ pero na'a rudzëjada', calëga tu' buí'inili', pero tu' ben yöl-la' ruhuí'ini queéli' na' ga bubí'i ládxi'li'. Dios bugunë' dxin yöl-la' ruhuí'ini queéli', para cabí ichixi iníguli' ni'a que le bentu' netu'.

¹⁰ Yöl-la' ruhuí'ini na' rugunë' dxin Dios run ga nu ubí'i ladxi' para ulá nu na', ate' que lë ni na' biti' ral-la' huí'iniru' que. Yöl-la' ruhuí'ini le naca que yödzülió ni run ga ilátigaca bönachi. ¹¹ Buli'yútsöca' ca bugunë' Dios dxin yöl-la' ruhuí'ini queéli' na'.

Ben ga ruí'i ládxi'li'-në' Dios.

Ben ga gú'unili' urúajli' dxi'a.

Ben ga guléli' nu na' ben dul-la'.

Ben ga rádxili'-në' Dios.

Ben ga bë' ládxi'li' gunli' ca rnna xtídzë'ë Dios.

Ben ga nadxí'ili'-në' Dios idú ládxi'li'.

Ben ga gú'unili' gunli' xíguia' nu na' ben dul-la'.

Benli' le naca bë' biti' bi dul-la' nabága'li' ni'a que lë na' guca.

¹² Que lë ni na', sal-la' buzúaja' caní lu guichi na', biti' guca ni'a que nu na' ben dul-la', en calëga ni'a que nu na' gudí'i guzxaca', pero para gaca bë' lahuë' Dios le nácatë ruí'i ládxi'li' netu'. ¹³ ¡Lë ni butipa ládxi'tu'! Calëgasö bidipa ládxi'tu', pero rudzéjade'e ládxi'tu' tu' rudzéjabi' bi'i Tito ni'a que le benli' libí'ili', tu' butí'pali' ládxi'bi'.

¹⁴ Bena' libí'ili' zxön lobi' Tito, ate' biti' benli' ga utuí'ida'. Bë'lentica'stu' libí'ili' didza' idütë li, ate' lësca' caní naca idütë li didza' bë'lentu'-bi' Tito cate' bentu' libí'ili' bal. ¹⁵ Zeaj rácarö idú ca nadxí'ibi' bi'i Tito libí'ili' cate' röjnebi' ca na' benli' ca rnna xtídzä'tu', en ca na' benli'-bi' bal lu yöl-la' radxi Dios queéli' en lu yöl-la' nöxaj ladxi' queéli'. ¹⁶ Rudzéjade'eda' tu' gaca uzxöni ládxa'a libí'ili' idú ládxa'a.

Ca ral-la' unödzej nu réajlë' Cristo le dë que

8 ¹ Na'a, böchi' luzá'ado', ré'ënitü' quíxjöi'itu' libí'ili' ca naca le buzá' ládxi'ë Dios quégaca yugu' cö' bönachi queë' Cristo luyú Macedonia. ² Sal-la' yenni' gula'guí'i gula'záquië' lu yugu' le guxí' bë' légaquië', bulu'dzéjade'enë', en idú ládxi'gaquië' bulu'nódzjadë'ë sal-la' nácaagaquië' bönachi yechi'. ³ Neda' runa' ba nalí quégaquië', idú ládxi'gaquië' bulu'nódzjadë'ë tsca gula'zéqui'në', en bulu'nódzjarë' tsca gula'zéqui'në'. ⁴ Gula'nábide'enë' netu', en guláta'yudë'ë lotu' güí'itu' légaquië' lataj tsözxón len netu' ilácalenë' böchi'ru' ta'yéajlë'ë Cristo. ⁵ Gulunrë' ca guqui ícjatu' ilunë'. Bulu'dödi cuíngaquië' zí'alö lu në'ë Xanru', enca' lu na'tu' netu', le naca le raza ládxi'ë Dios. ⁶ Que lë ni na' gunábitu'-bi' bi'i Tito údxi gunbi' xichinbi' ga ni' zóali', en utúbibi' dumí runódzjali' lu yöl-la' dxi'i ladxi' queéli', ca na' gusí lobi' benbi' zí'alö. ⁷ Nácali' lo ca naca yúgu'të le runli',

ca réajlë'ëli' Cristo,

en ca réajni'ili',

en ca ruzéajni'ili' bönachi,

en ca ruí'i ládxi'li' luzá'ali',

enca' ca nadxí'ili' netu'.

Lësca' caní ral-la' gácali' lo ca gácalenli' luzá'ali', lu yöl-la' dxi'i ladxi' queéli' bi unódzjali' quégaquië'.

⁸ Biti' rinná bé'eda' libí'ili' gunli' caní. Ruá'a didza' ca tun ia'zíca'rö bönachi, tu'nödzej idú ládxi'gaca, para guna' ga gunli' le gaca bë' naca idú ca nadxí'ili' luzá'ali'. ⁹ Nöz quézili' le buzá' ládxi'ë Xanru' Jesucristo queéru'.

Bilé'enë' yöl-la' tsahui'
pero para gácalenë' libí'ili'
böáquië' yechi'
para gata' queéli' yöl-la' tsahui',
tu' gúquië' Lë' yechi'.

¹⁰ Caní runi neda': Dxi'arö gaca queéli' údxi gunli' lë na' gusí loli' runli' chiguca tu iz. Gúcali' lo, calégasö ca bunódzjali', pero lësca' ca gú'unili' unódzjali'. ¹¹ Na'a, idú ládxi'li' buli'siyudxi gunli' lë na' gusí loli' runli', idú ládxi'li' bunódzjali'. Buli'nödzej na'a tsca séqui'li'.

¹² Channö ré'ënili' bi unódzjali', Dios runë' bal le runódzjali' tsca naca le dësö queéli'. Biti' rinabë' unódzjaröli' tsca le dësö queéli'.

¹³ Biti' ré'ënda' guna' ga unódzjali' le gácalen ia'zíca'rö bönachi ga idxintë yadzaj queéli'. ¹⁴ Ré'ënda' gaca tuz ca dë queéli', en quégaquië'. Na'a dëda' queéli' le gaca unódzjali' para bi gata' quégaca nupa ni' riyadzaj quéguequi. Ní'irö cate' bi yadzaj queéli', légaquië' huáca bi ulu'nödzjë' queéli' para caní gaca tuz ca dë queéli', en quégaquië' yúgu'tëli'. ¹⁵ Lësca' caní nazúaj lu guichi lá'ayi le rnna: "Nu na' butúbida', biti' bugá'ana que, ate' nu na' butubi láti'do'os, biti' biyadzaj que."

Ca runbi' bi'i Tito, enca' nupa dzágagaca lëbi'

¹⁶ iXclenë' Dios, tu' benë' Lë' ga ruí'i ládxi'bi' bi'i Tito libí'ili', ca na' ruí'i ládxa'a neda' libí'ili'! ¹⁷ Calégasö runbi' ca rnna xtídza'a bi rinábida'-bi', pero tu' ruí'i ladxi' cázabi' libí'ili', rácasö queébi' gú'unibi' tsöyubi' libí'ili'.

¹⁸ Risól-la'tu'-në' tsözxón len lëbi' böchi'ru' na' tun lë' bal yúgu'të cö' bönachi queë' Cristo, tu' runë' dxi'a dxin que didza' dxi'a. ¹⁹ Ia'stú, gula'bó yugu' cö' bönachi queë' Cristo bönni' ni, para tséajlenë' tsözxón netu' guá'atu' lë na' runódzjali', para gaca yöl-la' ba queë' Xanru', en gaca bë' ca' ruí'i ládxi'ru' luzá'aru' ta'yéajlë'ë Cristo. ²⁰ Caní gaca, gunë' netu' tsözxón para cuntú nu bi gaca inné queétu', ca rúnlentu' dumí na' runódzjada'ali', le gácalen bönachi yechi'. ²¹ Ruí'i ládxi'tu' guntu' le naca dxi'a, calégasö lahuë' Xanru', pero lësca' lógaca bönachi.

²² Risól-la'tu'-në' ca' ia'túë' böchi'ru' tsözxón len légaquië', ate' zían luzuí guzxí' bé'ëtu' lë', ate' naca bë' ré'ënë' gácalenë' rë'u idú ládxi'ë. Ia'stú, tu' ruzxöni ládxi'ë libí'ili', ré'ënitëronë' ca' gácalenë' rë'u lu dxin ni. ²³ Channö nu bi inaba ca nácabi' bi'i Tito, nácabi' luzá'a, rúnlenbi'

neda' tsözxón dxin para gácalentu' libí'ili'. Channö nu bi inaba ca nácagaquië' ia'zíca'rë' böchi'ru' na', nasól-la'gaca yugu' cö' bönachi queë' Cristo légaquië', ate' tunë' ga gaca yöl-la' ba queë' Cristo.

²⁴ Guli'gún ga gaca bë' nadxi'ili' légaquië' para iléquibe'e yugu' cö' bönachi queë' Cristo runli' caní, en ila'nözi naca idútë li didza' dxi'a ruí'itu' ca naca queéli'.

Ca naca dumí rutúbiru' le gácalen yugu' böchi'ru'

9 ¹ Ca naca le runódzjali' quégaquië' böchi'ru' ta'yéajlë' Cristo, biti' run bayudxi uzúaja' queéli' lu guichi ni. ² Chinözda' ca ré'ënili' gunli' lë ni, ate' ruá'a didza' lógaca bönachi ta'yéajlë' Cristo luyú Macedonia ni ca naca le dxi'a runli'. Riguíxjöi'ida' légaquië' ca naca queéli', zóali' luyú Acaya, chiguca tu iz chizóa gunli' lë ni, ate' tu' ruí'i ládxi'li' gunli' lë ni, bidipa ládxi'gaca lá'tu'biqui' yúgu'të bönachi ni ta'yéajlë' Cristo. ³ Na'a, risól-la'a yugu' böchi'ru' ni queéli' para gaca bë' naca idútë li didza' ruí'itu' ca naca queéli', ate' naca ca na' chigunnía' queéli', chizóa gunli' lë na' gácalen yugu' luzá'aru'. ⁴ Channö ila'zá'alén bal-la bönachi Macedonia ta'yéajlë' Cristo neda' tsözxón, ate' gaca bë' biti' zuíni gunli' lë na', ní'irö utuí'itu' tu' buzxöni ládxi'tu' libí'ili', ate' libí'i cázali' ca' ral-la' utuí'ili'. ⁵ Que lë ni na' gúquida' ral-la' isól-la'a yugu' böchi'ru' ni para ila'dxinë' ga zóali' zí'alö ca neda', ate' ilácalenë' libí'ili' para udxí utúbili' lë na' guzxí' lu ná'ali' unódzjali'. Caní gaca, údxí utúbili' dumí na' zí'alö ca idxina', ate' gaca bë' runódzjali' tu' ré'ëni cázali', en calëga tu' rinná bé'etu' libí'ili' bi unódzjali'.

⁶ Guli'tsöjné lë na' rnna:

Nu raza ruzóa láti'do'os, láti'do'os ca' uzí'.

Nu raza ruzóa sizxöni, sizxöni ca' uzí'.

⁷ Tu tuli' ral-la' unódzjali' tscá na' chinuzóali' icja ládxi'do'oli', en calëga lu yöl-la' ruhuí'ini queéli' o tu' run bayudxi, tu' nadxi'inë' Dios nu runódzaj idú ladxí'. ⁸ Dios gaca gúnnadë'ë queéli' ca riquínili' para gata' queéli' yúgu'të lë na' riquínili', ate' ugá'ana queéli' para gaca gácalenli' nu bi riyadzaj que. ⁹ Lësca' caní nazúaj lu guichi lá'ayi le rnna:

Idú ládxe'ë bunódzjë' quégaca bönachi yechi'.

Naca bé'tica'sö yöl-la' dxi'i ladxí' queë'.

¹⁰ Dios, Nu runna queéru' bi gaz uzóaru', enca' bi guí'aj gáguru', gunnë' ca' queéli' bi unódzjali', le naca ca lë na' nu raza ruzóa, en gunë' ca' ga ila'yán le ilápali' le nácagaca yugu' le dxi'a runli'. ¹¹ Dios gunë' ga gáta'da' queéli' yöl-la' tsahui' para gaca unódzjada'ali'. Caní gaca, yugu' le unódzjali', lë na' quísitu' uláz queéli', gun ga ila'nná bönachi zían: "Xclenë' Dios." ¹² Lë na' runódzjali' le gácalen yugu' böchi'ru', calégasö güí'i quégaquië' le ta'yádzjanë', pero gun ga ila'nnë': "Xclenë' Dios."

¹³ Cate' gunli' caní, ila'gu'ë Dios yöl-la' ba tu' gaca bë' runli' ca rnna

didza' dxi'a queë' Cristo ca na' rnnali' runli'. Ila'gu'ë Lë' yöl-la' ba ca', tu' nácali' dxi'i ladxi', runódzjali' quégaquië', enca' quégaca ia'zica'rö bönachi. ¹⁴ Ulu'lidzë' Dios, en ila'nábinë' Lë' gácalenë' libí'ili' tu' nadxí'iguequinë' libí'ili' ni'a que le buzá' ládxi'dë'ë Dios queéli'. ¹⁵ iXclenë' Dios, bennë' tu le nácada' lesaca' queéli'!

Yöl-la' unná bë' dë lu në'ë Pablo

10 ¹ Ta'nná bönachi naca' nöxaj ladxi' cate' zóalena' libí'ili', pero cate' zoa' zi'tu' ga zóali' naca' rugu ladxi' ca ruzúaja' lu guichi. Tu' náquië' nöxaj ladxi', en dxi'i ladxi' Cristo, neda', Pablo, ráta'yua' loli' ² cabí gunli' ga gun bayudxi gaca' rugu ladxi' len libí'ili' cate' idxina' ga zóali'. Chizóa gaca' rugu ladxi' len nupa ni' ta'nná runtu' dxin ni lu yöl-la' bönáchisö queé'tu'. ³ Le nácatë nácatu' bönachi, pero calëga rácasö queé'tu' runtu' xichinë' Dios. ⁴ Yugu' le rudí'initu' lu gudil-la, biti' nátagaca ca le tu'dí'ini bönachi yödzülió ni lu gudil-la, pero yugu' le rudí'initu' lu gudil-la nápagaca yöl-la' huáca queë' Dios, le ruguntu' dxin para usunítitu' le nál-lagaca que tu' xihui'.

⁵ Rusunítitu' yugu' didza' biti' nácatë le tu'zxöni ládxi'gaca bönachi, en yúgu'të le tun ga tun ba zxön cuínguequi, en le tun ga cabí ilunbë' Dios. Runtu' ga gaca ila'nná bé'enë' yúgu'të le ta'zá' ládxi'gaquië', lë na' tun ga ta'dá'baguë'ë Dios, ate' runtu' ca' ga tunë' ca rnnë' Cristo. ⁶ Tödi gunli' le gaca bë' naca idú ca runli' ca rnna xtídzë'ë Cristo, sóatu' sina' guntu' xíguia' yúgu'të nupa ni' ta'dá'baga' xtídzë'ë.

⁷ Ruyuli' le nalá' láhuisö. Channö réquinë' nu bönni' dzáguië' libí'ili' néquinë' queë' Cristo, ral-la' guéquibe'enë' ca' lë ni: Ca na' lë' néquinë' queë' Cristo, lësca' caní netu' néquitu' queë' Cristo. ⁸ Biti' ca' rutuí'ida' sal-la' gudödi bë' ben ba zxön cuina' ca naca yöl-la' unná bë' budödë' Xanru' lu na'tu'. Lë na' dë lu na'tu' naca para guntu' ga gácarö idú ca réajlë'ëli' Cristo, en calëga para usunítitu' libí'ili'. ⁹ Biti' ré'ënda' guéquili' ré'ënda' gun gádxida' libí'ili' ni'a que le ruzúaja' queéli' lu guichi ni. ¹⁰ Nacuá' ni' nupa ila'nná: “Yugu' le ruzúajë' Pablo queéru' lu guichi, rulidza zi'ë rë'u, en ralë' didza', pero cate' zóalenë' rë'u runë' nöxaj ladxi', en didza' gúlado' ru'ë.” ¹¹ Nu na' ruí'i caní didza' ral-la' guéquibe'e lë ni: Ca na' nácatu' cate' bi ruzúajtu' queéli' lu guichi tsanni ni zóatu' zi'tu' ga zóali', gácatu' ca' lu le guntu' cate' ni' sóalentu' libí'ili'.

¹² Le nácatë biti' nácatu' rugu ladxi' para innatu' nácatu' lëbi ca nátagaca nupa ni' tun ba zxön cuínguequi. Nátagaca nupa ni' yugu' bönni' biti' bi nózguequinë'. Lu le ta'za'sö ládxi'gaquië' tu'zöë' ca ral-la' ilaca bönachi, en tu'chi'a tu'söröë' la' légacasë' tsca naca lë na' ta'za'sö ládxi'gaquië'. ¹³ Netu' biti' gunrö ba zxön cuintu' ca ral-la' guntu', pero ca nácatë dxin budödë' Dios lu na'tu', ate' lu dxin ni, ral-la' guntu' le ga ni' zóali' libí'ili'. ¹⁴ Channö budödë' Dios lu na'tu' dxin guntu' ga zóali',

biti' ca' gudödi bé'ëtu' ca bentu' cate' bidxintu' ga zóali', en bentu' libán que didza' dxi'a ga na' zóali'. ¹⁵ Biti' run ba zxön cuintu' ca naca dxin núngaca ia'zíca'rö bönachi, pero ca nácasö dxin na' budödë' Dios lu na'tu'. Runtu' löza gácarö idú ca réajlë'ëli' Cristo para gaca guntu' dxin ga zóali' le nácarö lesaca', tsca naca le budödë' Dios lu na'tu' guntu'.

¹⁶ Ní'irö gaca guntu' libán que didza' dxi'a ga nacué' yödzö dzö'ö zí'tu'rö ga zóali'. Caní gaca, biti' gun bayudxi gun ba zxön cuintu' ni'a que dxin núngaca ia'zíca'rö bönachi, lë na' budödë' Dios lu né'eguequi.

¹⁷ Nazúaj lu guichi lá'ayi le rnna:

Nu ré'ëni bi gun zxön,
le ben cazë' Xanru' ral-la' gun zxön.

¹⁸ Nurúajë' dxi'a tu bönni' cate' rnnë' Xanru' nurúajë' dxi'a, en calëga cate' ru'ë caní didza' bönni' na' que la' cuinsë'.

Ca nácaquië' Pablo, en bönni' tun cuíngaquië' gubáz queë' Cristo

11 ¹ Ré'ënda' guá' ilenli' neda' tsanni ni gu'a didza' lu yöl-la' biti' bi nözi quia'. Buli'sá' ládxi'li' quia'. ² Ruí'i ládxa'a libí'ili' ca na' Dios caz ruí'i ládxi'ë libí'ili', tu' nácali' ca nácabí' tubi' bi'i nigula ra'bando', naca idú ládxi'bi', rusudxina'-bi' lahuë' Cristo para utsaga ná'alénbi' Lë cazë'. ³ Rádxida' idxín queé'li' nu si' ye'e libí'ili', en gun ga usanli' ca nadxí'ili'-në' Cristo idú ládxi'li', ca na' guca queénu Eva, nigula queë' Adán, cate' guzxí' ye'e Satanás tu' xihui' lënu lu yöl-la' sina' que. ⁴ Caní rnní'a tu' idú ládxi'li' ruí'ili' nu za' queé'li' lataj, en run libán que xibá queë' Jesús, le nadzá' ca naca xibá na' bentu' netu' libán que, ate' rizí' lu ná'ali' tu bö', en tu didza' dxi'a le nadzá'gaca ca náca'gaca Bö' Lá'ayi na', en didza' dxi'a na' guzxí' lu ná'ali' lu na'tu' netu'. ⁵ Réquida' biti' nácara' cuídí'sö ca nácaquië' bönni' ni' nácatërögaquië' lo, ate' réquili' nácaquië' gubáz queë' Cristo. ⁶ Nadxi ca' naca' cuídí'sö ca ruá'a didza', pero biti' naca' cuídí'sö ca naca yöl-la' réajni'i napa'. Zían luzuí, en zían ca buluí'itu' libí'ili' ca naca yöl-la' réajni'i nápatu'.

⁷ Nadxi ca' biti' naca dxi'a tu le bena', biti' bi buquixja' libí'ili' cate' bena' libán ga zóali' que didza' dxi'a. Ben cuina' cá'asö, ate' bena' ga gúcali' libí'ili' zxön. ⁸ Buguna' dxin le nequi quéguequi ia'zíca'rö cö' bönachi queë' Cristo, tu' guzxi'a dumí bulu'nödzjë' légaquië' quia' para guca bena' dxin ga zóali' libí'ili'. ⁹ Cate' guzóalena' libí'ili', en biyadzaj quia', biti' busaca' zi'a nituli' libí'ili', pero lë na' biyadzaj quia', gulunnë' quia' bóchi'ru' bila'rúajë' luyú Macedonia, en bila'dxinë' ga zoa'. Catu caz busaca' zi'a libí'ili', ate' la' lébisö ca guna'. ¹⁰ Ni'a que le naca idútë li queë' Cristo le zóalen neda', biti' soa' dxisö, gun ba zxön cuina' ca naca lë ni idú luyú Acaya. ¹¹ ¿Naru' réquitseli' rnní'a caní tu' cabí nadxí'ida' libí'ili'? Nözinë' Dios nadxí'ida' libí'ili'.

¹² Gúntica'sa' ca runa' na'a, para cabí gata' quégaquië' lataj ilún ba zxön cuíngaquië' bönni' ni' ta'nnasë' nácagaquië' gubáz queë' Cristo, en ta'nné' tunë' xichinë' Lë' ca runtu' netu'. ¹³ Biti' ca' nácagaquië' gubáz nasól-lë'ë Cristo. Ta'zì' yë'ë ca naca dxin tunë', en tun cuíngacasë' gubáz queë' Cristo. ¹⁴ Biti' ral-la' ubániru' ca tunë' bönni' na'. Lësca' Satanás caz, tu' xihui', ruluí'i cuini ca tu gubáz lá'ayi queë' Dios, ridé' lu bení'. ¹⁵ Que lë ni na' bití' ral-la' ubániru' channö yugu' huen dxin que tu' xihui' na' tu'luí'i cuíngaquië' ca nupa tun xichini Nu na' naca tsahui'. Udxí quégaquië' ca sa'yéaj le tunë'.

Yugu' le gudí'i guzxáquë'ë Pablo

¹⁶ Leyúbölö rea' libí'ili': Cuntu nu ral-la' guequi nachixi icja'. Channö réquili' nachixi icja', guli'güi' neda' lataj gu'a didza' ca tu bönni' nachixi icjë', para gun ba zxön cuina' tu chí'ido'. ¹⁷ Didza' ni ruá'a bití' naca le rinná bë'ë Xanru', pero ruá'a didza' ca tu bönni' nachixi icjë', run ba zxön cuina'. ¹⁸ Nacu'ë zían bönni' tun ba zxön cuíngaquië' ca nácagaca le tunë' lu yöl-la' bönáchisö quégaquië'. Que lë ni na', neda' ca' gun ba zxön cuina'. ¹⁹ Tu' réquili' rácada'ali', idú ládxi'li' ruí'ili' lataj ilu'ë didza' yugu' bönni' nachixi ícjagaquië'. ²⁰ Ruí'ili' ca' lataj nu gun libí'ili' bönni' nadó'ogaca, o nu cúa le dë queéli', o nu inná be'e libí'ili', o nu ucá'ana libí'ili' cá'asö, o nu capa' rú'ali'. ²¹ Rutuí'ida' rnnía' lë ni: Biti' bentu' caní queéli' tu' gudödi bë' gúcatu' nöxaj ladxi'.

Channö zoa nu naca rugu ladxi' para gun ba zxön cuini, neda' ca' gaca' rugu ladxi', en gu'a didza' ca tu bönni' nachixi icjë'.

²² ¿Naru' nácagaquië' bönni' hebreo?

Lësca' naca' neda'.

¿Naru' nácagaquië' bönni' Israel?

Lësca' naca' neda'.

¿Naru' nácagaquië' zxí'ini xi'sóë' Abraham?

Lësca' naca' neda'.

²³ ¿Naru' nácagaquië' huen dxin queë' Cristo?

Lësca' nácatëra' neda'.

(Na'a ruá'a didza' ca tu bönni' nachixi icjë' cate' rnnía' caní.)

Béntëra' dxin ca gulunë' légaquië'.

Guyu'a lidxi guíë zíanrö luzuí ca gula'yu'ë légaquië'.

Gula'zé'eda' neda' yu bönachi zíanrö luzuí ca guca quégaquië'.

Guzóa bönadxi gátia' zíanrö luzuí ca guzóa quégaquië'.

²⁴ Gayu' luzuí yugu' bönni' judío gula'guínë' neda' guídi.

Tu tu luzuí na' gula'guínë' neda' chënna uruá' luzuí.

²⁵ Tsonna luzuí gula'guínë' neda' gubá'ayi.

Tu luzuí bulu'ladxë' neda' guíøj.

Tsonna luzuí guzóa' tu lë'e barco le guca ditaj, en bötaj lu nísado'.

Tu luzuí guzóa' idú tu yëla, en tu dza lu nisa que nísado'.

²⁶ Zián luzuí cate' ni' yu'a nöza,
 gudöda' gapa guzóa bönadxi quia' yugu' lu yegu,
 en gapa guzóa bönadxi quia' lu ná'agaquië' gubán,
 en gapa guzóa bönadxi quia' lu ná'agaquië' bönni' uládz quia',
 en gapa guzóa bönadxi quia' lu ná'agaquië' bönni' zi'tu',
 en gapa guzóa bönadxi quia' lu yödzö,
 en gapa guzóa bönadxi quia' lu lataj cá'asö,
 en gapa guzóa bönadxi quia' lu nísado',
 en gapa guzóa bönadxi quia' lu ná'agaquië' bönni' ta'zí' yë'ë, ta'nnë'
 nácagaquië' bóchi'ru' ta'yéajlë'ë Cristo.

²⁷ Bena' dxin zi'i, en gudú ládxa'a.

Zián luzuí biti' guta' quia' lataj gásia'.

Guduna', en gubidxa' nisa.

Zián luzuí biti' guta' quia' bi gahua', o ga utsë'e cuina', o lari'
 gácua'.

²⁸ Ia'stú, yúgu'të dza ruúbi ruguí'ida' tu' ruí'ida' ládxa'a yúgu'të cö'
 bönachi queë' Cristo. ²⁹ Cate' nu ricuidi', neda' ca' ricuídi'da'. Cate' nu
 run ga ichixi iníguinë' tu bóchi'ru', rileda' nu run caní. ³⁰ Channö run
 bayudxi gun ba zxön cuina', gun ba zxön cuina' ca naca le nácagaca bë'
 ricuídi'da'. ³¹ iDios, Xuzë' Xanru' Jesucristo, gácatíca'sö queë' yöl-la' ba!
 iLë' nózinë' ruá'a didza' idútë li! ³² Cate' ni' guzóa' lu yödzö Damasco,
 bönni' ni' guta' lu në'ë uláz queë' bönni' rinná bë'ë, lë' Aretas, bucu'ë
 yugu' bönni' gula'bó' nísië' para ila'zönë' neda', ³³ pero yugu' bóchi'ru'
 ni' bulu'dödë' neda' tu ga ra'a bení' que yu'u, yu'a tu ga'böra zxön, en
 bulu'zötjë' neda' ní'ilö lu zö'ö run chi'i yödzö na'. Caní guca, bulá' lu
 ná'agaquië' bönni' ni' gula'bó' nísië' neda'.

Yugu' le buluí'inë' Dios Pablo

12 ¹ Le nácatë biti' ral-la' gun ba zxön cuina'. Sal-la' caní naca,
 na'a gu'a didza' ca nácagaca le buluí'inë' Xanru' neda', en le
 buzéajni'inë' neda'. ² Núnbë'a-në' tu bönni' réajlë'ë Cristo, chiguca
 chidá' iz zoa nu guché' lë' yehua' yubá. Biti' nözda' channö guyijë' ni' lu
 idútë le naca cazë', o lu bö' naca cazë'. Tuzë' Dios nózinë'. ³ Nözda'
 guyázië' lataj lachi queë' Dios, nazí'i le paraíso. Biti' nözda' channö
 guyijë' ni' lu idútë le naca cazë', o cabí. Tuzë' Dios nózinë'. ⁴ Tsanni ni'
 zoë' ga na', biyönnë' le tun ga nu rubani, yugu' le biti' dë' lataj nu gü'i
 didza' que. ⁵ Bönni' ni' huáca guna' lë' zxön, pero biti' gun ba zxön
 cuina'. Tuz gun ba zxön cuina' tu' ricuídi'da'. ⁶ La'tu' gué'ënida' gun ba
 zxön cuina', biti' gaca' bönni' biti' bi nózinë', channö innía' le naca
 idútë li. Na'a, biti' gun ba zxön cuina' tu' cabí ré'ënda' nu gunrö neda'
 bal tsca le bilé'e bena' neda', o tsca naca didza' biyóni bë'a neda'.

⁷ Ní'irö, para cabí tödi bë' gun ba zxön cuina' tu' bilé'eda' lë' na' tun
 ga nu rubani, Dios buzöë' tu huë' lu xipéla'a le riláda' ca rilá ga riné' tu

yötsi'. Huë' na' guca ca tu le bugún dxin tu' xihui', para busaca' zi' neda'. Caní guca quia' para cabí tödi bë' gun ba zxön cuina'. ⁸ Tsonna luzuí gúta'yua' lahuë' Xanru', en gunábida' Lë' ugüë' xihuë'a na'. ⁹ Xanru' gudxë' neda': "Nácatë quiu' le ruzá' ládxa'a quiu'. Uzí'tëru' xibé le ruzá' ládxa'a quiu' cate' ricuídi'nu'." Que lë ni na', rudzėjade'eda' tu' ricuídi'da'. Tu' raca caní quia', rácalentëro yöl-la' huáca queë' Cristo neda'. ¹⁰ Que lë ni na', tu' nadxí'ida'-në' Cristo, rudzėjada' cate' ricuídi'da', en cate' nu rulidza neda' zi', en cate' bi riyadzaj quia', en cate' nu ribía ladxi' neda', en cate' bi raca quia'. Cate' nacuídi'da', nápatëro caza' yöl-la' huáca queë' Lë'.

Pablo ruí'i ládxe'ë bönachi queë' Cristo nacuá' Corinto

¹¹ Naca' tu bönni' biti' bi nóżinë' tu' bë'a didza' ca naca le dxi'a bena' neda'. Libí'i cázali' benli' bayudxi bena' caní. Libí'ili' ral-la' gunli' neda' bal, ate' sal-la' biti' bi naca' neda', biti' ca' nácara' cuidi' ca nácagaquië' bönni' ni' nácada'gaquië' lo, ta'nnë' nácagaquië' gubáz queë' Cristo.

¹² Yugu' le bena' lu yöl-la' riböza zxön ladxi' quia' ga ni' zóali' nácagaca bë' naca' gubáz queë' Cristo. Bilé'eli' yugu' le bena', le nácagaca bë', en le tun ga nu rubani, en yugu' yöl-la' huáca zxön que yehua' yubá. ¹³ Tuz le cabí bena' ga zóali' le bena' ga nacuá' ia'zíca'rö cö' bönachi queë' Cristo. Biti' busaca' zi'a libí'ili' bi gúnnali' le guí'aj gahua'. Buli'niti lo neda' tu' cabí bena' caní queéli'.

¹⁴ Chizóa guída' ga zóali' le bunni luzuí. Biti' bi inaba' gúnnali' quia'. Ré'ënda' gunna cuin cázali' quia', en calëga bi dë queéli'. Yugu' bi'i hué'ënido', biti' run bayudxi ulu'gágubi' xuz xiná'agacabi'. Xuz xiná'agacabi' na' ral-la' ulu'gahuë' xzí'inigaquië'. ¹⁵ Idú ládxa'a utóa' yúgu'të le dë quia', en udödi cuina' ni'a queéli' para gaca bi uzí'ili' xibé, sal-la' réquida' cate' nadxí'iröda' libí'ili', zeaj ruhuéchi' yöl-la' nadxí'i queéli' neda'.

¹⁶ Nöz quézili' biti' busaca' zi'a libí'ili'. Na'a, bál-lali' innali' guca' sina', ate' len didza' biti' nácatë buzi'a xibali'. ¹⁷ ¿Naru' réquitseli' guzxí' yé'eda' libí'ili' cate' gusól-la'a yugu' gubáz quia' ga zóali'? ¹⁸ Gúta'yua' lobi' bi'i Tito tséajbi' ga zóali', ate' gusól-la'a-në' bóchi'ru' na' tsözxón len lëbi'. ¿Naru' réquitseli' buzí'ibi' xibali' bi'i Tito? ¿Naru' cabí bentu' la' lëbisö ca runtu' bi'i Tito, en neda', enca' la' lëbisö didza' bé'ëtu'?

¹⁹ ¿Naru' réquitseli' rubéaj cuintu' dxi'a loli' libí'ili'? Lahuë' Dios ruí'itu' didza' uláz queë' Cristo, böchi' luzá'ado', ate' yúgu'të le runtu' nácagaca para gácarö idú yöl-la' réajlë' queéli' Cristo. ²⁰ Rádxida' biti' gácali' ca ré'ënda' gácali' cate' guída' ga zóali', ate' neda' biti' gaca' ca ré'ënili' libí'ili' gaca'. Rádxida' ridil-la' dídza'li', en ruzxé'eli' luzá'ali', en rileli' luzá'ali', en rulidza dítjali' luzá'ali', en rnnëli' que luzá'ali', en run ba zxön cuinli', en rutsátsali'. ²¹ Cate' guída' ga zóali', channö caní raca queéli', rádxida' gunë' Dios ga utuí'ida' ca naca queéli', ate' gun bayudxi

cödxa' ni'a quégaca zián nupa ni' gulún dul-la', en biti' bulu'bí'i
ládxi'gaca ca náacagaca le cabí naca tsahui' gulúngaca, en yugu' le
gula'zé ládxi'guequi le cabí naca dxi'a.

Pablo ruzéajni'inë' bönachi Corinto, en rugapë' Dios légaquië'

13 ¹ Le bunni luzuí ni guída' ga zóali'. Nazúaj lu guichi lá'ayi le
rnna: "Run bayudxi ila'cuá' chopa tsonna nupa ilún ba nalí
channö nu bi uzegui luzé'e didza'." ² Chibuzéajni'ida' nupa gulún dul-la'
cate' ni' guzóalena' libí'ili' le buropi luzuí, ate' na'a ruzéajni'ida'
légaquië' leyúbölö, enca' yúgu'të nupa tun dul-la', sal-la' ni zoa' zi'tu',
rnní'a: Channö guída' ga zóali' leyúbölö biti' gaca' nōxaj ladxi' para til-
la' légaquië'. ³ Rinábali' tu le gaca bë' ruá'a didza' uláz queë' Cristo. Lë
na' guna' gaca bë' ruá'a caní didza'. Biti' ca' ricuíd'i'në' Cristo cate' bi
runë' queéli', pero lu yöl-la' huáca zxön queë' runë' bi runë' queéli'. ⁴ Le
nácate' gudé'ë lë'e yaga cruz ca nu ricuidi', pero zoë' nabanë' tu' zóalen
yöl-la' huáca queë' Dios Lë'. Netu' ca' ricuíd'i'tu' tsözxön len Lë', pero tu'
nácatu' tuz len Lë' nabantu', ate' zóalen netu' yöl-la' huáca queë' Dios bi
guntu' ga ni' zóali'.

⁵ Buli'yú cuinli' channö réajlë'ëli' Cristo o cabí. Guli'sí' bë' la' cuínsili'.
¿Naru' cabí nōzili' zóalenë' Jesucristo libí'ili' channö le nácate' réajlë'ëli'
Lë'? ⁶ Runtu' löza chinóz quézili' le nácate' netu' réajlë'ëtu' Cristo.

⁷ Rulídzatu'-në' Dios rinábitu'-në' gácalenë' libí'ili', para cabí guá'ali'
dö', calëga para urúajtu' dxi'a netu', pero para gunli' libí'ili' le naca
tsahui' sal-la' guéquili' richixi riníguitu' netu'. ⁸ Biti' ca' gaca tá'baga'tu'
le naca idútë li, pero gácasö guntu' ca sa'yéaj le naca idútë li. ⁹ Que lë ni
na' rudzéjatu' cate' ricuíd'i'tu', ate' libí'ili' ridipa ládxi'li'.
Rulídzatica'stu'-në' Dios, rinábitu'-në' gunë' ga gaca idú ca réajlë'ëli'
Cristo. ¹⁰ Que lë ni na' ruzúaja' queéli' lu guichi lë ni tsanni ni zoa' zi'tu'
ga zóali'. Ní'irö cate' guída' ga zóali' biti' gun bayudxi usaca' zi'a
libí'ili', pero uguna' dxin yöl-la' unná bë' nudödë' Xanru' lu na'a, le naca
para utipa' ládxi'li', en calëga para usunítia' libí'ili'.

¹¹ Na'a, böchi' luzá'ado', dipa ládxi'li'.

Guli'güí' ládxi'li' gaca idú ca réajlë'ëli' Cristo.

Guli'güí' ládxi'li' ca' lë ni rea' libí'ili'.

Guli'gaca tuz len luzá'ali', en guli'cöza dxí'ado'.

Rinábida'-në' Dios sóalenë' libí'ili'.

Lë' nadxí'inë' rë'u, en runë' ga ribózaru' dxí'ado'.

¹² Guli'gapa Dios luzá'ali', tuli' ia'tuli', en unída'li' luzá'ali'. ¹³ Yúgu'të
böchi' luzá'aru' ni tu'gapë' Dios libí'ili'.

¹⁴ Rinábida'-në' Dios gunë' ga gata' queéli' yúgu'tëli' le ruzá' ládxe'ë
Xanru' Jesucristo queëru', en idxí'inë' ca' libí'ili', en gunë' ga gácali' tuz
len Dios Bö' Lá'ayi. ¡Ca' gaca!